

El dernière dè Zante:

Passé deux mois d'souffrance(s).

Zante es't'in chançard!

In effet, les Contributions vont li rind' des yards.

Il avoût r'çu in papî du contrôleur el prév'nant qu'il avoût droit à in remboursemint dè 194,25 € à touchê indèyans les deux mois. El papî î daté du 14 dè juin.

I m'a d'abourd fallu li spliquê qu'l n'aroût nê ses yards pou l'14 d'awout, nê pasquè ç'î l'veille du 15 d'awout mais pasquè I pay'té toudi fin d'mois. Bref, pou l'31, il aroût s'n'assignation ou bî les yards s'rin'té su s'compte à l'banque. In tél arrindj'mint en' li plaijoût nê branmint mais du l'ai rapaujê ène bèquée in li d'sant què quand ça s'roût a li à payê, I povoût fait l'min-me sins avoû d'misère.

Quand, dèbut septimb', I n'a rîn vu v'ni, ni su s'compte, ni dins s'boîte, il a couminchê à s'inquièter èyè surtout à s'énerver.

I n'a nê fait ni yeune ni deux: Il a téléphonné au numéro noté su l'avertissement. Il est donc arrivé au bureau d'el Louvière ayusqu'il a ène madame, foût djintille d'ailleurs, qui li a répondu après 24 ou bîn 30 sonneries.

Il a couminchê pa li dire qu'l stoût bîn heureux dèl l'avoû pasquè Il avoût asprouvé l'veille pindant toute l'après-din-nér! (Notèz qu'il est bîn scrit su l'papî: Bureau accessible uniquement de 10 à 12h.)

Avant qu'l n'couminche à dèsbobinér s'n'affaire, el madame-toudi bîn djintille) li a d'mandé s'nom èyè surtout el numéro du rôle qui figure tout in whaut à gauche.

Après ène minute ou deux (dè r'cherche sins doute), elle li a dit: "Je crois qu'il y a un problème". (Ca, Zante s'in doustoût bîn qu'il avoût in problème!) Elle arajouté què comme el dossier astoût parti pu whaut pou paiement, el seûle solution pou Zante, ç'î dè scire-ni téléphoner-à l'Direction d'Charleroi èyè pu précisémint au

"Service des fonds en souffrance".

El djintille madame n'a nê seu s'impétchê dè rire quand no Zante li a d'mandé bîn sérieux'mint: "Dites, Madame, I faut mett' **S** a souffrance?"

Elle li a répondu in riant: "Faites comme vous le sentez".

Zante a dit qu'l d'alloût in mett 3 pou yesse seûr èyè il l'a r'mercyê.

Comme ç'est mi qui li a fait l'lett', Il a toudi ravisé pad'seûr em'n'espale pou vîre si du chuvoûs ses instructions èyè du n's'roûs nê saisi qu'l n'eunche soulignê les fameux S avant d'poster s'lett'.

Du n'ai quand min-me s'té d'accoûrd d'ajouter in paragraphe pou rèclamer el prix du timb' Prior èyè les intèrêts dè r'tard!

C'n'est nê mi qui signe mais tout d'min-me!



Aux dernières nouvelles, el problème s'roût-infin-solutionné èyè Zante a r'çu ses yards.
Dommage pasquè es'n'intervintion chuvante aroût sùr'mint s'té foürt comique à raconter!

Françwès.

Passé deux mois = plusque/rapaujî = apaiser/debobinér = raconter,
déballer/doustér = douter/s'impêchî = s'empêcher/toudi = toujours/espale =
épaule.